



REPUBLIKA E SHQIPËRISË
KËSHILLI I MINISTRAVE

PROJEKTVENDIM

Nr. _____, datë _____

PËR

**DISA SHTESA DHE NDRYSHIME NË VENDIMIN NR. 682, DATË 29.7.2015, TË
KËSHILLIT TË MINISTRAVE, "PËR PËRDORIMIN E FONDEVE PUBLIKE PËR
TRANSPORTIMIN E PUNONJËSVE ARSIMORË QË PUNOJNË DHE TË NXËNËSVE
QË MËSOJNË JASHTË VENDBANIMIT", I NDRYSHUAR**

Në mbështetje të nenit 100 të Kushtetutës, neneve 5, 6, 19 dhe 28, të ligjit nr. 69/2012, datë 21.6.2012, "Për sistemin arsimor parauniversitar në Republikën e Shqipërisë", i ndryshuar të kreut II, të ligjit nr. 8308, datë 18.3.1998, "Për transportet rrugore", të ndryshuar, të ligjit nr. 9936, datë 26.6.2008, "Për menaxhimin e sistemit buxhetor në Republikën e Shqipërisë", të ndryshuar dhe të ligjit nr. 137/2020, "Për buxhetin e vitit 2021", me propozimin e ministrit të Arsimit dhe Sportit, Këshilli i Ministrave,

VENDOSI:

1. Në vendimin nr. 682, datë 29.7.2015, të Këshillit të Ministrave, të ndryshuar, bëhen këto shtesa dhe ndryshime:
 - a) Në shkronjën "a", të pikës 1, pas fjalëve "mësues, edukator," shtohen fjalët "...oficerë sigurie, punonjës të shërbimit psiko-social),..." dhe pas fjalëve "mbi 5 km" shtohen fjalët "... deri në 50 km ...".
 - b) Pika 2, ndryshon si më poshtë:

"2. Njësitë e vetëqeverisjes vendore, miratojnë rrjetin e linjave të transportit, mbështetur në numrin e fëmijëve, nxënësve dhe të mësuesve që planifikohen të përfitojnë nga ky shërbim, sipas kritereve të përmendura në pikën 1 të këtij vendimi, bazuar në informacionin që marrin nga zyrat vendore të arsimit parauniversitar, brenda muajit tetor për vitin e ardhshëm buxhetor. Listat e përfituesve, konfirmohen nga zyrat vendore të arsimit parauniversitar pranë njësitë të vetëqeverisjes vendore për distancën nga vendbanimi i përhershëm dhe dërgohen në drejtoritë rajonale të arsimit parauniversitar

për të realizuar procedurën e prokurimit publik brenda muajit nëntor për vitin e ardhshëm buxhetor.”

c) Pika 3, ndryshon si më poshtë:

“3. Drejtoritë rajonale të arsimit parauniversitar prokurojnë fondet publike për linjat e transportit të nxënësve dhe punonjësve arsimorë sipas rrjetit të linjave të transportit rrethqytetase, të miratuara nga njësitë e vetëqeverisjes vendore ose qendrore, në përputhje me legjislacionin në fuqi për prokurimin publik.

Me fillimin e procedurës së prokurimit publik, drejtoritë rajonale të arsimit parauniversitar autorizojnë zyrat vendore të arsimit parauniversitar të mbulojnë shpenzimet për linjat e transportit të nxënësve dhe punonjësve arsimorë përfitues deri në përfundim të procedurave të prokurimit dhe lidhjes së kontratës, me fondet e akorduara nga buxheti i ministrisë përgjegjëse për arsimin për këtë qëllim.”

d) Pika 4, ndryshon si më poshtë:

“4. Në rastet kur procedura e prokurimit publik të linjave të transportit, të parashikuar në pikën 3 të këtij vendimi, nuk realizohet me sukses nga drejtoria rajonale e arsimit parauniversitar, me autorizimin e kësaj të fundit, zyra vendore e arsimit parauniversitar siguron mbulimin e shpenzimeve për linjat e transportit të nxënësve dhe punonjësve të arsimit parauniversitar publik përfitues, nëpërmjet llogarive bankare në bankat e nivelit të dytë të prindërve të nxënësve kujdestarëve ligjorë apo përfituesve me prokurë të posaçme ose nëpërmjet shërbimit postar për ato zona ku shërbimi bankar mungon apo është jo lehtësisht i aksesueshëm, në përputhje me pikën 2 të këtij vendimi, deri në përfundim të vitit buxhetor.

Masa e shpenzimeve për llogaritet mbi bazën e numrit të ditëve mësimore, numrit të mësuesve që janë paraqitur në punë, numrit të nxënësve që kanë ndjekur mësimin, çmimit e indeksuar me normën e inflacionit të biletës për linjat ndërqytetëse apo rrethqytetëse të transportit, të miratuara me vendimin nr. 146, datë 26.2.1998, të Këshillit të Ministrave, “Për ndryshimin e tarifave të transportit të udhëtarëve”, të ndryshuar, duke shtuar vetëm për nxënësit, edhe një bonus prej 50% mbi çmimin e indeksuar të biletës, si dhe në bazë të akteve të tjera ligjore dhe nënligjore në fuqi, duke filluar nga data 01.01.2022 dhe në vijim”.

e) Në fund të fjalisë së shkronjës “c” të pikës 5, shtohet togfjalëshi “deri në 50 km.”.

f) Pika 5/1 ndryshon si më poshtë:

“5/1. Zyrat vendore të arsimit parauniversitar dhe njësitë e vetëqeverisjes vendore bashkëpunojnë dhe koordinojnë të dhënat për numrin e përfituesve dhe largësitë nga vendbanimi dhe raportojnë në ministrinë përgjegjëse për arsimin, çdo tre muaj.”

g) Pika 6 ndryshon si më poshtë:

“6. Efektet financiare që rrjedhin nga zbatimi i këtij vendimi përballohen nga buxheti i përvitshëm i Ministrisë përgjegjëse për arsimin, e cila transferon fondet përkatëse te zyrat vendore të arsimit parauniversitar, si dhe nga buxheti i njësisë së vetëqeverisjes vendore, në rastet kur me vendim të organeve kolegjiale, njësitë e vetëqeverisjes vendore mund të financojnë shpenzime transporti për nxënësit dhe punonjësit e arsimit parauniversitar publik edhe për distanca të tjera, jashtë parashikimeve të këtij vendimi.”

2. Ngarkohen ministria përgjegjëse për arsimin, ministria përgjegjëse për financat, drejtoritë rajonale të arsimit parauniversitar, zyrat vendore të arsimit parauniversitar dhe njësitë e vetëqeverisjes vendore për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI

Edi RAMA